



Pisortatigoortumik marlunnik inuiattut erinarsuuteqarnerput nalilersoqqittariaqarnerlutigu apeqquteqaat aallaavigalugu oqallisissiaq.
(Inatsisartunut ilaasortaq Peter Olsen, Inuit Ataqatigiit)

Inuiattut erinarsuutivut marluusariaqarpat?

Nunarput utoqqarsuanngoravit kiisalu Nuna asiilasooq 1979-imi namminersorneruleratta tamarmik inuiattut erinarsuutinngortinneqarsimapput naak siulleg, tassalu nunarput utoqqarsuanngoravit 1910-ip kinguninnguali inuiattut erinarsuutitut isigineqarsimagaluartoq.

Inuiattut erinarsuutit marlunnorsimanerannut suut pissutaarpiarnersut matumuuna eqqartorneqassanngillat naak taallat taakku tamarmik immikkut inuiattut misigissusitsinnik attuillutillu ersersitsisaraluartut.

Sooq marlunnngortinneqarsimanersut akinngikkaluarlugu marluunerat qanoq nassataqarnersoq, ataasiussanersoq, ataasiinnanngussappat sorliussanersoq, imaluunniit nutaamik taalliortoqassanersoq isummersorfigissavarput.

Marluussappat?

Oqallissaarisooq isumaqatigeqqajaanangitsuunngilaq marluunerat soqutigineqassusiannut sunniuteqarsimagunarmat. Ataatsimimmi eqqaamajuminartumik inuiattut erinarsuuteqarsimagaluarutta qularnarpallaanngilaq amerlanerusugut alanngaarsinnaassagaluaripput imarisaanilu oqaatsit pingaartinnerusimassagaluarivut. Taamaammat isumaqaaqqajaanarpoq inuiattut erinarsuut ataasiinnaassasoq. Inuiattut erinarsuup ataatsip, inuiaat kinaassusiannut tulluurtup, aammalu eqqaamajuminartup inuiattut ataasiussuserput suli annerusumik naqissusissagaa qularnanngilaq. Tassa, pitsaanerpaassaaq ataatsimik inuiattut erinarsuuteqarutta.

Taavami sorliussava?

Erinarsuutit marluusariaqannginnerannik siuliani taaneqartutut isummerutta taava arlaat sorliussanersoq aamma isummerfigisariaqassavarput isumaqarutta taakku arlaat toqqassagipput. Taamaattoqassappat taava siulliulluni atulersup toqqarnissaa ajornannginnerussagaluarpoq sorleq arlaat naleqqunnerunersoq assortuussutiginnikkaluarlugu. Taallalli taakku tamarmik immikkut assigiinngitsunik misigissuseqarfigineqarmata aamma arlaannaannik toqqaanniarneq immaqa aatsaat inuiannik taasititsinikkut tamanut naammaginarnerusumik aalajangiivigineqarsinnaavoq.

Nutaamimmi?

1910-ip kingornaniit maannamut pissutsit allanngorsimaqimmata, aammalu naalackersuinikkut inissisimanerput allanngorsimaqimmat nutaamik erinarsuuteqalernissarput pissusissamisuginnassanngikkaluarnepoq? Inuiaat namminersornissaminnik, namminerisaminnik naalagaaffittaarumalleruttorfianni alloriarnerit pingaarutillit ilaattut immaqa inuiattut erinarsuutitaartariaqarpugut.

Maanna inuiattut tunngaviusumik inatsisissarput suliarilereerparput, ilaat aqaguinnanguaq namminersortunngorumapput, ilaalli piareersaqqaarumapput. Tassa ullut nutaat nammineerumaffiit nalliussimapput, tupinnassanngilarlu inuiaat nutaamik aamma erinarsuutitaarumassagaluarpata.

Taavami qanoq iliussaagut? Oqallinneq manna siammarniarli. Inatsisit tunngaviusut pillugit oqallinnermut ilanngullugu inuiaqatigiinnut oqaluuserisassanngortinneqarniarli. Ataaseq nalunngilarput, inuiattut erinarsuuteqartariaqarpugut tamatta pigisatsinnik ajornanngippallu amerlanerpaat alanngaarsinnaasaannik.